

小謨觴館詩文集

文集序

海內設者相與揚權百六十年來人文蔚起獨士能爲古文者加少以是缺憾于學者余竊不然易堂甫東桐城諸家各持其古文以行天下雖學或有至有不至其傳固緜延而未已也惟排偶之文則幾于曠絕又匪啻百年矣蓋南宋後陳義愈高講于文者愈略坐令漢魏風流一墜不可復自近二三十年老生巾箱中物稍益不靈其爲說益不足以困魁岸之士于是湛博絕麗之才稍稍閤出余少歲亦嘗攘臂其間蹉跎中隳去而徒業旣默默內自慚惋私以望諸同人妄謂斯文無墜必有英絕領袖之者何其宜見而久弗見耶鎮洋彭子湘涵方今魁岸之士而湛博絕麗之才之一也爲善有暇篤著文業其爲文專力排偶夫文何有奇偶哉九州四隩

見于書斷壺叔苴詠于詩其文奇歟偶歟莫得而離判之也
班揚極其盛于漢韓柳起其衰于唐其文奇勝歟偶勝歟莫
得而輕重左右之也蓋奇偶之用不齊而一真孤露吹萬畢
發氤氲于意象之先消息于單微之際上者載道下者載心
其要固一術爾湘涵少長邊塞多接通流精求緣起熟析利
病有山川以助其奇有風雲花鳥以壯其思又不幸久困有
羈愁騷屑摧撞拂鬱以激宕其中之所存繇是侘辭異采匪
意橫發長篇短章隨變雜施持原以往扶氣以立陽開陰闔
神出鬼沒而一皆以自載其心湘涵不自知其文之爲偶爲
奇讀者亦且忘乎其爲排偶之文焉余胥疏江海所默默悵
望于海內同人者遇湘涵而快然一慰又憮然深惜其能歎
其猶未焯然見褒錄于當時也雖然湘涵年未四十鏤而勿

舍計必且恢之彌廣異日推其所潤身者以華于國何遽不
鼓鐘一世將余所謂英絕領袖曠百年幾幸見之者亦在湘
涵所自命何如而已會其所刊小謨觴館文集告成過辱不
遺謂序斯集非余莫宜燒燭循覽輒不自禁爲夸詫慙慙之
如是嘉慶十有一年長至前十日長洲王芑孫序

小謨觴館文集卷第一

鎮洋

相

賦

五臺山賦

佇中區以遐矚睇孱顏而聊浪海浮鼇而棲聖嶽作鎮而奠
方誇五城於鴻烈紀三百於蒙莊二韭石室四明玉堂九嶷
九曲七榻七箱是皆振靈鷲出嶠陽集松偃韜琳琅紛總總
以轆轤矣難得而具詳曾何若蘊真萃異迓
屬車而演大乘若代北之清涼原夫五臺之爲山也左鄰恒
嶽右接天池逾三萬仞而標峻廓五百里以爲基雁門嚮界
而承踵飛狐律兗以分支蓋雲中上黨固天下之脊而茲山
之嶺岷崔嵬乃更什伯而過之是以孕煙霧障娥義橫臨朔

漠藩屏甸畿雖禹貢職方莫之載而實首富媼以稱奇在漢
明代有竺法蘭飛錫震旦以慧眼觀謂文殊之眷屬祝三乘
於茲山於是精藍建紆塋構供鐵輪規靈鷲侶集黃緇房開
青豆封剎竿而雪肥耿佛幢而鐙瘦鐸鳴風而鳥驚鉢洗潭
而龍守合八部於人天悉五峰之宿畱其東臺則池俯滹沱
峰聯插箭華林櫛爽以捎雲溫泉泌洳而曳練妙吉祥所徵
集陀羅延所游衍盼溟渤於滄瀛渺洪波之如綫忽明霞之
盪胸晃朝陽而閃電其西臺則厓峙薩埵巖幽秘魔竹古滴
翠石怪成螺一優曇鉢遺其跡八功德水激其波眺斜月之
在樹挂圓鏡之新磨林壑特秀厥惟南臺嵌巖倚傾勢若覆
盃香閣金燦神鐙夜來爛八臂之寶相涌一成之聖堆雜花
禁以彌布伊錦繡之誰裁北臺岩龕云協斗杓黑龍潛而闕

雨紫霞深而斷巒截半麓以爲界乃羣靈之所朝氣變黻而足不能上兮神閃屍疑可招風雲雷霆皆出其下兮夫何論乎野衲與山樵至若中臺勝境稱最仙餌菊而徑香獅踏花而林馥玉池妍媸而敷華髮塢晃朗而吐怪結萬載之寒冰當九夏而不壞環空青之四圍拱一峰而如帶此其表大士之五智合性源之五陰清五濁之災世運五乘之道林是以首冠五方之髻頂建五佛之簪旃檀上浮歌利下臨梵郁細氤雲氣如輪莊嚴七寶中遊化人耀紅炬於陰壑吐黃光而燭垠証祇洹顯應真師利演說阿育化身寧止如陶侃之所夢與裴休之所陳載稽前史崇建紛然魏文則十二置院開皇則三僧設筵鑄金容於貞觀之代錫玉劄於景德之年於以祈嘉祉申祝延歷元明而弗替永法炬之綿綿迨乎我

國家之奄有天下也天岱發靈宗河啓籙緬風山之訪道繼
崑峰之刻玉

列聖相承勾陳載夙上爲

慈宮祝釐下爲蒼生錫福山旋妙相之螺輦繞銜花之鹿虎
一矢而無聲鵠翻飛而下矚固已揚金甍與玉璫遍臺蜂與
苑鵠今

皇上紹天闡繹冠德卓蹤月窟日域來享來同乃戒甘泉之
鹵簿復

徼巡乎五峰斯時也鈴珥番徒婆羅法侶雕題冒珣之倫木
壘花門之旅榆櫨函開羊皮紙古鐘魚唱而海潮翻笳螺鳴
而佛香聚羣華旗以鬣雲霏招搖之花雨

天子方且皇然以思泊然以處覘唐魏之儉風撫華戎之卽

敘閔雪窖與冰天莫容寒而怨暑是以

宸章摘藻念典學也毘曇心印示先覺也福田牖善宏普樂也殊俗咸臻懷沙漠也是蓋建中和勤遠略迓純禧顯於鑠豈徒洗秋眼於神區契心倪於道籥追弇山之樹槐效岱宗之薦帛而已哉風舉雲搖饒川藻野

六飛還兮香煙畱初地寂兮嵐靄惹聳五朶之蓮花燦大千之蘭若歷萬古今長青共祥雲而上下

雁門關賦

并序

雁門關在代州西北三十里雁門山上雙關斗絕一名西陲予自少歲遊晉道出此關俯仰今昔輒形歌詠意有未盡復援筆而賦之辭曰

凜凜凋歲嶢嶢塞垣黃蘆匝地層冰射天斜日奄忽薄於虞

淵一徑入雲有關屹焉爾其俯滹沱通廣運隔六角障全晉
圭峰夏屋承其趾龍河豹突流其潤望虎落之周遭壓龍堆
而稱峻屢巖壁立闔闔洞開喉火星燦堞齒鱗排風緊馬縮
天空雁來飛樓臺其縹緲東旌紛以琤璫西顧了角偏頭東
睇紫荆倒馬山川鬱而相繚泉石渥兮成滄渺幾代之烽煙
判何年之夷夏緬漢唐之糾紛獨蒼然而涕灑想夫奉春旣
逝韓王殞身谷蠡方伉孤塗弗寶元光之代發卒萬人修土
櫓以遏衝儲蘭石而拒塵終何險之能塞徒膏野而化燐況
乃大黃不發太白當中將軍失李賢守悲馮戊巳屯撤東西
尉空凡夫五原吏卒三河美丰荆楚劒士葍漢熨僮莫不搜
白刃冒霜鋒飲羽有技橫草無功壯士骨白佳人淚紅嗟此
嶢嶢而摧墜幾經猿鶴與沙蟲若其就輦庭辭蘭苑驅玉輪

張油幃明妃去番翁主嫁遠走跣跣之明馳感芳華之婉婉
覩此天蒼野茫露宿星飯角起哀來雲黃春斷能無琵琶不
和襜褕失暖長吁白登之臺彈淚紫濛之館更有雄主阿廢
奇兒黑鴉千乘萬騎獻縱射犯銀槍駐隊玉帳開牙刀奪霜
皎風吹帽斜此皆蓋世之傑如博得梟力闢土宇威懾天驕
奈何長星易隕霸業煙消離宮敲兮蔓草白影堂寂兮靈風
飄惟雙闔之如斗猶亭亭而岌岌於是棄繻傀人龐眉書客
駐鞭於句注之巔探符於常山之脊嘆射虎之無人笑食厓
之笑益聊煩寃而攄懷弔什一於千百關石兮戕戕關榆兮
晉蘿迴颺颺兮生粟戍卒暇兮枕戈據鞍攬轡爲雁塞之歌
歌曰紫厓高兮九邊伊阻遭時清兮一夫何禦折邊花兮醉
邊醕吟勅勒兮悵無侶獨絞汨而徊徨兮感英雄與兒女

校古雁門關唐時所築在雁門縣西北五十里今關爲明
初所移非古雁門關也人多傳會附識於此

自記

托邏臺弔楊太尉賦

并序

寧武關東陽方口西高山有臺名托邏一曰橐蓮相傳爲宋
王侁望楊業軍處間嘗驅車過此按諸圖經揆以當日情勢
雖未見其必然要爲近是予悲業以智勇捍邊之才爲庸帥
所制一誤於潘美之沮議再誤於王侁之撤兵卒致王師敗
衄身殉敵國當時名將如曹成王者尙不能與契丹角而邊
患益滋燕雲永棄浸成孱國自此始矣業之死實有宋全局
所關爰作賦以弔之蓋不僅爲太原降將表其區區忠烈也
辭曰

夫何登高而望遠兮地膊膊而無歧杳不見十帳與九帳兮

何有於三交駐泊之旌旗昔在天水之初葉兮合南北皮室
而內窺寢應旣復而旋失兮又歧海之喪師惟君侯素號無
敵兮殲咄李如摧枯敵望影而引退兮獨持重乎老謀謂宜
先出乎雲州之衆兮我以騎攻其中堅謂兵盛而勿與爭兮
爲三州保其萬全詎護軍之沮議兮轉相譏以畏鹵鑿凶門
以促行兮動北川之鉦鼓知犯忌之罔濟兮奈奸邪之予侮
猶悞咍而望生兮指陳家谷以張弩兇重慳以貽繆兮欲爭
功而望之誤戰敗以爲勝兮緣交河而速馳迨君侯之至斯
兮谷口呀以無人遂拊膺而大痛兮殘卒疲而再振張空拳
以反鬪兮日慘慘其西下深林密以馬蹶兮望袍影而發射
竟宛轉而就禽兮空喑鳴而叱咤占三日之不食兮問盡忠
其誰駕嗟有宋非無人兮顧邊才之難再彼曹田潘王之嘆

喈兮何遇梟羅而輒敗時得將如公輩兮足籌邊而敵愾卽
不能犁庭而封狼居胥兮亦何至澶淵之後悔固知奇材之
必遭嫉兮不見謗書之潛上何偏裨之能從死兮獨庸帥之
不諒猗開基之英主兮尙長城之自喪彼斷善而害能兮夫
何惑乎中興之諸將徒悼悵以感予兮陟崇岡而涕潛旣悲
夫猿臂之不封兮又惜乎都尉之沒番與君侯茫茫其同恨
兮雁山淒其暮煙賦之以代薤露之歌與符鳩之曲兮流哀
音於九邊

飽箭賦

柳外場圓幕南地空城曦欲斜戍角初動令方秋而氣激弓
折膠而潑重颿霜颺之載颺汗圳雲之低擁爾其材翦楷楚
羽量審搏三鏃鏃卸六角工剡倣鶉鵲之嘉製等彤旅之美

觀雖芒頓而質脆亦外雕而體完作貢嬀州齊倫夏服宛庚
公之去金異耿恭之傳毒弦鳴冒頓之庭的畫道成之腹於
是上郡材官期門韋弁野無控鏑之驚軍息汰斬之戰高牙
乍閒芳酒欲薦埒直堂寬身輕藝練發疾音高抨孱韻顫各
望審而心平要巧貴而力賤中宮中商或疾或徐怒偶號竅
樂真出虛類風蕭之感召分天籟之于喁書桴停而歌作畱
遺響於烏烏則有都軍馬邑飛將龍城居安慮危嘆喑屏營
薄陵颺之一呌究實效於五兵願勵咎而淬鏑長樹侯而設
正兌枵中而乏用亦何取乎虛聲

苦寒賦

圉落馭辰頊冥殿歲霸虛虹藏暄序電逝值枚生之在楚喻
列子之嫁衛仰胚渾之曾穹俛芒黥之綿地豐聞罕漫慘廩

悽慄曜靈韜輝屏翳弭節風弮張而颺帷霞揣封而殺物潛
鱗收其蝟螭翔羽戢其聲耳惻惻愀愴經窅鬱律葉變變而
奪林氣濂濂以砭骨山含瘁色川涸靈源吟階潛蛭繞樹驚
猿蓬孤或振沙走難搏月小逾苦霜嚴不繁軫寥泬之凋歲
感蹠征之未還則有冽冽辰水滔滔武溪精夫睢刺殃徒侏
僂連營鳥避積甲山齊箐密林邃星殞鏃飛盤瓠之首雖馘
新息之師尙羈砦險旌凍牙高鼓希鳶無毒而亦墮馬長征
而不肥殺黽阨陜荆沔上游烝徒則燹道巴道天險則雍州
益州肆吮磨於貔兪逞肩髀於蚩尤援桴者九節度攤鐸者
四姓侯蕭摩訶之擲鏡毛萇樂之捧矛拉捩摧藏颺紛攙搗
烽燿瀕洞宙合塲黷戈淬鏑而指僵甲裂裳而膚粟幼平之
四體刻剜充國之全屯輟瘞蹶哭將於青羌盼哀歌於黃竹

嚮之大隄歌舞武陵川原白鹽赤甲清瀾藍田歛銅鞮而無
曲蹂桃徑以奚仙竭嘉魚於丙穴喑鳴雉於秦川悽嚶冥而
鬱岬猓恹恹以煩冤別有鯁壑翻鯨牙厲乘崩雲鼓飛柁天
霄忽幽陰火失熾僅邀路之虛循恫衝波之孫泰紛馬銜與
海童渺戈船兮下瀨聞颶母而神悚禱陽侯而心戒至若瓠
子隄潰宣房跡淪萬手舂鋪千石焚薪冰岸削鐵淅淩蹙銀
魚頭戢戢鵠面莘莘蜷局蜩縮鱗屈鱗皴尺涕垂鼻寸禪掩
身爨冷哭而無火泣荒榛而有人疇弗撫徂年而悼恹擎清
涕於蕭晨迴眺閨紆懷故家罄陳平之糠粃蔽仲蔚之蓬
麻剩腰襜而妻瘦索複襦而弟譁苦等倉雀號同樹鴉紅灰
杙炭青逼釭花愀自濟以乏術嗤康衢之願奢萬緒會悲百
緣赴感徊徨齋閣斥廢鉛槧顏瘠瘠而變腴視矍矍而辭覽

寵爐暖不能蘇久侵之肌秣酒醎不能融已銷之膽詩嘆其
雱爻占習坎漢揚雲之牢愁楚屈平之顛領烏庠常貞者七
曜代更者四時候無剝而不復事無陂而不夷矧秦階之如
砥屬烏奕之昌期會吹律於黍谷迂羣生以春祺系曰二儀
幹運若鼓桴兮擎歛棣通迭相乘兮杓迴斗旋德喜贏兮晡
時闇昧耀光明兮嘔咐醞釀慶莢生兮負暄飲和夫何慮營
兮

廣問大鈞賦并序

唐劉夢得領郡不調孤居慮靜有感於老則易至否不終傾
上問大鈞述而爲賦予幼稟庭誥忝竊浮譽漸冉濩落志業
弗進今年三十有七室不謀養殯名不登舉選流轉顛躓與
書傭游惰爲伍疾疹侵陵精爽日去思涸廢井智憊挈瓶豈

阨塞之遭并神明亦靳而不與乎煩冤紆鬱其視夢得蓋又
倍蓰過之仰觀元化不能無疑呵壁有辭悉之於夢聊爲廣
問大鈞賦倣其體不襲其辭以自廣焉

麗鴻宕冥兮倒景睠璚宮眩眩兮無爲而尊清陽苞物兮
疇相因盟常羊蹢通兮大鈞所根是佐帝而持樞兮佩琳綺
之尊神陶埏密移羸歛莫測太清不言工則或識賤臣有疑
惟工解惑曰噫吁嘻郁乎蕃哉喙息蠢動蒙生其間微塵一
蠓或跖而安或夷而阨或董而裘或尉而潛反仄相仍錯迕
孰制上規千齡下察並世纖兒猥徒丹紆紫曳以蒙相儕胥
靡臺隸小夫黯伯持梁饜脆以蒙擬之瓢覆簞敝坎塲無膏
或貽聰明踔厲奮發以靳德成不角而翼神怡體輕何又靳
之錮智矧精恣茹委靡善病若醒芒芒天漢疇則徑濟膊膊

下土孰則高厲思窮宙而達幽兮懼司命之莫聊羌天網之
絃覆兮樛黃靈而是筮於是莞焉魂交雪兮形開恍有化工
翩然下來赫眎揚休顧而哈曰何下土之昧於幾也橐籥司
柄吾處其一芒芟主宰爲汝略悉乘流得坻雖曰命定孰堪
孰否亦視其性櫟樾力致羸沒心競渾元鑒誠精至斯應賦
形汝同方足圓顙孟晉逮羣所性獨殊衆輻所輳歧情慵趨
世態所豔孤懷弗愉非狷非狂似文似儒於事則廢於途爲
迂進退兩失被嗤大愚汝自不驚何咎於吾越裝千金侏儒
囊粟曳裾大第抵掌華屋求知掃門買聲持牘贍徧八口仁
及三族是皆脂韋不辭趨趨沾尊餘瀝冀光宵燭汝又弗爲
色赧容蹙周行易遂汝故曲之生事萬端汝故鞠之徒色瘠
而思綿兮守刈編與鬻簡耽睽瞞而踈斐兮宜曜晦而光剋

且夫不齊者運至變者機彼孟軻之深帷兮遜隴廉之自媒
憲修潔而屢置兮桑心計而豐貲蘭數慨而不茂兮艾無霖
而亦滋介鳥飢而塌翼兮林鴟飽而翔嬉爰居何福鐘鼓雄
尊羊豕何辜鼎俎炮燔何櫟而保何美而髡朝菌何怨冥靈
何恩回遘轆轤曷可殫論苟尺度而寸繫將疲神而役魂吾
哀汝窮用黜汝聰精膽汝鑠瘡疥汝攻手足情竅膚色昏膏
雖無醴酎而醉比於醇醲雖在盛年而耄竝於龍鍾是蓋俾
汝壹枯苑混榮辱祛躁安安恬漠忘熱烈與卑碎任騰超與
拓落平客氣之儼興消亢衷之歎薄解嘲奚煩於子雲嫉邪
免賦於元叔昏昏墨墨冥冥蹟蹟隨世俛仰與化推遷其遇
誠塞其天則全錫汝孔厚夫何疢疾之爲患焉工語未終悚
然意下感渙矇發曲跼而謝幸三靈之無譴悟六極之匪咎

俟河清以祗憂從元謀而自守雲霞燦而可被兮沆瀣清而易茹毋泯忍以改初兮長遺形而寡侶修心齋兮規坐忘俟將迎兮獨旅拒始自今茲終極倚杵世有蒙生永事斯語

江上愁心賦并序

江上愁心唐人賦之予自毀齒迄乎壯強南北塗經奚啻百度言愁始欲愁矣孤舟燒燭遂成此段體雜辭尤有識勿哂賦曰

揚子江頭揚子津無賴楊花愁煞人千年江水只東去四月江南猶好春年年歲歲江如故歲歲年年雙楫渡人歌人哭水聲中不覺不知元髮素江草兮低迷江煙兮懽悽或江撓之齊發或江颿之迅飛或涉江而綬綰或連江而資齋如室有闕如戶有扉旅出旅入旋即旋離閔予生之渺特具勞人

之百憂嘆非宦而非賈乃風愁而水愁綿歲歷辰自髫迄壯
揚舲坐欵擊楫孤唱徘徊江岸之旁躑躅江樓之上耿爪步
之鐙明咽南徐之笳愴如雲蓬蓬乍西乍東如九張機往來
憧憧非麾扇之吳猛非橫江之阿童非宣城之賦練非馬當
之助風地迴天長蹤孤野曠曩古悲於寸眸入新愁於遐望
高山低山近渚遙渚蕭蕭叢蘆隱隱孤嶼丹黃兮平林青蒼
兮極浦悵亭亭兮夕陽忽濛濛兮細雨白馬銀濤裏長檣鐵
鹿間吳舫不入耳櫓謳難解顏朝色悞墨暮思緜攣擬伏枕
而無寐復伸眉而倚舷眠鷗嬉汀浴鷺依藻亦有安居樂羣
馴擾豈其吾生不如江鳥啞波瀾暫作隊蜎蜎自得其天悠
然此身豈其吾生不如江鱗愁心欲遣愁轉賒一天曠色催
歸鴉傾江作酒不成醉落月搖情江樹斜

鐙舞賦

小謨觴節文集卷一

十一

駿鳥馳輝顧兎生魄廣場面花妍爨當夕憐素習之仙伶訝
全新之晚飾南油西漆桂馥蘇煎長稱鳳脰短號螭盤覆金
枝而吐秀藏鐵缺而浮煙千影萬影風裳水裳棚高焰舉釧
動衣香儵彈日而齊俯或扶輪而上揚反腰蛺蛩聯臂揮霍
珠樹梭穿紅蓮綺錯豹屑芬淳蛾飄花落泊微颺之弗颺爛
繁星以四灼荆苑纓絕齊臺髡醉閒愁欲萌餘歡將墜咸瑣
院之炬移渺曲江之球會撫華夢以眩眩中宵而興喟若
夫羈孤袂連江湖侶嘯厖籥狐之伏鳴軫澤鴈之哀噉瓜廬
之曲哭誰黔績女之鄰光不耀各當筵而綵歛願分輝以下
照庭樂息奏牆雞發聲依依綺座黯黯朱檠還紅蓄之館寂
倚氷除而氣清香羅九華撒屏風六曲橫惟餘短檠在應知

楚客情

小謨觴館文集卷第二

鎮洋 彭兆蓀 湘涵

序

經歧臆案序

古之學者三年一藝但以存大體玩經文而已自金鏡亡於
暴秦珠囊理於炎漢百家鋒起支葉繁滋一經之義言至百
萬一師之門人或數千遂有折角摧鋒操矛伐異魏晉以降
詮釋益多男子有笄劉芳騁華林之辯慈母無服貞素覈內
則之文發難正譌羅絡旁午簡策所載毛舉莫勝王仲寶答
陸澄書云易體微遠實貫羣籍施孟異聞周韓殊旨豈可專
據小王便爲該備善哉言乎餘經可類推矣今世儒業約分
兩途浮學守株祧唐宗宋上昧賈馬鄭王之是非下襲濂洛

關閩之糟粕蒙存淺約陋說膠其心詁訓傳箋大師絕其系
及第取於帖經而專門之業遂廢此有唐歸崇敬所以嘆也
其有饜書嗜古習性文身棗竹背傳說有鑒於安度議師立
異解致戒於賈邊直欲父康成兄子慎寧道孔聖誤諱言鄭
服非是又元行沖所詆也反是二者以作調人博存衆家實
事求是自我心極爲之主宰難乎哉昔在弱年婁經研索包
并總統不拘滯於隅角搜揚翦截各參伍其端倪或辨析幾
微或詳考名物數說殺列不免乖疑間以臆推決其得失單
詞隻句旣遜延君之訛書小辯瑣言復慙叔重之異義巾箱
局鐻久付矣蟬衣食驅遣十更涼燠羈雌多暇輒復緡帑譬
之竹馬鳩車不能無戀惜已聊錄副墨以實行滕顒家見之
必當大噱要以踵蔣氏蠡測陳氏稽疑步趨後塵或未多讓

每條冠以某案猶仍東京許氏例也

讀史偶鈔序

今將由叔末以逡循蜚摭殘竹以求提地鉅神千五百歲皇
王六十四民庸成冊府之所藏戎夫左氏之所紀雀籙蘿圖
渺不可見矣乃若古籍求諸帝魁寶書得於子夏九月經立
三傳文垂久已列諸學官揭若日月至於勒成一書分爲五
體龍門而下較並列眉綴學之士善文之徒莫不泛涉津涯
兼綜得失然班馬殊體貴審其異同嗟彪合刊易淆其志傳
裴注以補而彌博晉贊以駢而可刪迨乎宋齊中多闕佚姚
氏一家之作亂例者兩朝元魏百卷之書不完者廿九百藥
遺策補綴所餘德棻殘編斷爛尤甚延壽綜述四朝而南不
逮北李唐新舊一體而昀終勝祁五代必歐薛同參三史惟

遼金差善凡諸綈裘匪易盧牟鉛槧所及去取攸繫予以弱
齡仰稟庭訓研經之餘纂記前典愧陸鍾之夙慧暗誦五行
纂知幾之析疑通覽羣史於是剔毛攬翮窮西極辰露鈔雪
纂紙約需乎八千月緯年經藁不盈乎兩屋或考訛糾繆旁
采劉邠吳縝之言或互證參稽間附貞觀咸淳之注略紫陽
所已載補涑水所未詳體例各準乎原書繁簡一定以已意
蚤謀止於善草蠹策擷其朝華縮千帙於一囊臂肘可繫巢
長編於小牘巾箱易藏味有等於醬醢誦無嫌於斷鶴於以
稽鏡前哲網羅舊聞三千年之事巨細略可睹焉淮南有云
心所悅毀舟爲枕心所欲毀鐘爲鐸竊取斯義以備遺忘藏
山傳人兩無所冀蓋不欲與楊侃之博聞沈樞之總類較短
長字句間也

選注引書目錄序

總集有選肇始昭明唐初江都李氏善與許淹公孫羅並承
曹憲爲文選學轉相教授而李注獨行方雅清勁舊書品其
飭躬敷析淵洽新書稱其撰述有初注覆注三注四注羅羣
玉之總總該百氏之云云非祇騁博爲藝林山淵兼擅析疑
資通儒考鏡若桓譚譚拾之殊張釋釋卿之誤厥次無縣漢
志偶疎思晦非騫梁典或謬牛子爲從而譌後鴻飛何纂而
舛慕策邵不可爲營邵史岑不得頌和熹骨母爲胥湓湓作
衍九遷以一月爲一日永始以四年爲三年葛天之歌張揖
錯其文韎昧之曲左思複其字守闕乃廣漢而非延壽黜殯
屬史魚而非柳莊丁亥丁未辨日辰之差中郎侍郎証官制
之異是皆稽覈豪芒鈇覘紕繆略舉數端要可隅反苟非精

博絕出何以臻此顯慶三年始進定本開元六載益以五臣
呂延濟輩禱昧寡學迴非善倫李匡又資暇錄辨寒鼃與芳
蓮耶光庭兼明書訂雲絜與藻稅蘇氏志林嗤三殤之妄解
洪氏隨筆斥宗袞之誣說其所抨擊炳炳矣竊謂善注定宜
專行其所徵引秘牒填委唐書藝文志遺佚已多馬氏經藉
考十裁一二單辭有同於玉屑隻字不殊於金版宋深寧叟
閱覽博物卓躒古今然九星三略之說夏屋仁里之訓翠粲
官錦之文跼蹐巢許之辨率皆鉤剔疑互藉爲資糧非徒物
析天雞精擅試士地詳茂苑博誇吳宰而已予自童少迄於
壯齒徧歷寒燠銳心研摩涯涘莫窮津逮無盡嘗欲取注中
羣籍已未佚者分部列之挈祕典之綱維便汲古之檢閱人
事錯迕忽忽未暇近閱武林汪師韓文選理學權輿中列目

錄二卷計經類自傳訓以至小學緯候圖識凡二百十六種
史類自正史以至別傳譜牒地理術藝凡三百九十五種子
類自諸子以至兵書道經釋論凡一百六十九種集類四十
八種詩一百五十四家賦二百八家頌箴銘贊六十八家碑
三十三家誄哀辭連珠五十家詔表牋啓三十八家書八十
九家弔祭文六家序及雜文一百六家舊注二十九家其卽
入選之文互引者不與焉種別部分秩如瞭如學者按古籍
稽舊聞寸簡在手按圖可索是亦衆絲之繫籩散錢之貫繩
也近刻有孫志祖案語中有未盡覆加訂正手錄一冊弄之
巾箱或補或糾分繫於下汪書自有單行此本取便尋討蓋
倣七略之義條其衆篇校四庫之目斯爲獨古云

紅蕙山房倡和詩序

嘗聞劉彥和之言曰蘭爲國香服媚彌芬書亦國華玩澤方
美豈非以根同富媪而肸蠁者悅魄事歸晏娛而娛文者揚
徽葢索胡繩之纚纚則都梁迷迭不能斂其芳也羅皇墳之
賁賁則芝房菌宮不能掩其雅也若今袁子紅蕙山房其殆
勤思兼兩矣乎初崑山健庵司寇開書局於洞庭東山戢耆
羣籍鋪棻鴻藻厥有紅蕙蘼藹其旁星霜代移菴茂無改於
是洞庭鉏子匪石效䟽麻之折作文無之贈而楓橋袁子壽
階爲築塢而蒔焉憶夫承接茵憑薰染煙墨府羅羣玉室啓
謨觴湘雨方歇朱顏酡些萬籤錦暉煥色色同百軸油拳流
香香雜門疑通德作帶縈書地似羽陵代芸走蠹或上公簪
筆露眼旁窺或羣士哦松頰容流笑此紅蕙之前塵也至乃
巖暄野淑波麗帆開辭石戶而下單椒入葢間而就小築東

皇載豔紅影搖雲有美移家狂香擁權性殊橘化踰淮益良
子有蘭心雜佩以贈草上君遷之號室同善人而居此紅蕙
之受遣也精廬杳窅旋房便娟培以隱士泥清潤以仙人水
綠珠點夕露金然曉光亭風汎馨佇月搜豔動則奪目靜則
襲人丹榴窅窅無此靡顏朱榮熙曜逐彼潛穎此紅蕙之振
奇也雖然土夫木伯懷離芷而不芳辛楣藥房人嫋嫋而增
美在昔一茅三脊藉泰岱之金繩百莖孤根任孔林之玉策
眷言珍卉例近文章然則人非天士曷稱靈華地乏書城難
安香種今袁子汲古得綆真想在襟讀百二十國之寶書禿
千五百皮之毛穎丹函壓地彩帙熙天千年脈望竹素成團
一片心香人花同氣俾色而珊瑚枝架赤鬬采而藜火搖青露
稱研朱秋相吹息是又紅蕙之諧際而文字之緣深故也時

則大雅鱗萃八風棣通齋閒塵橫夜寂琴暢一倡百和總總
擢擢錦瑟湘波之韻瑤情左徒之篇各爲傳神不辭書葉而
僕則因之有感焉以彼巖隱挺秀非不貞妻也而糞壤雜之
茫岑宗生非不荃寄也而艾蕭浼之霜巖影獨山空跡孤雖
余情其信芳渺斯世其焉託豈有厠巨公冊府登通士墨莊
薰沐儒林始終文囿紅絲潑潑吐齊爭輝彤管飛花流丹角
豔若此蕙者其出處豈偶然乎國香國華載服載玩猗歟袁
子斯之謂已爰繼叔夜懷香之賦代小草輦言卽倣揚雲篆
刻之文爲羣公牋導

畢季瑜詩集序

夫豫章瑰姿必攢柯於窈谷金銑茂器類耀珍於鼎門稽古
一颺一臚繼采南都四括四黃紹芬北代過江瑯琊之集成

家者百人彭城秘書之族能文者七十咸席華閥互挺雅材
而簡札委於哀蟬年祺悲其颺電豈非聯肩抱玉而冠倫爲
難衆手操觚而壽世卒異若夫厠優鳳之列獨號歸昌擅宗
駒之名尤推符拔旣卓礫乎羣雅斯照燭乎三才是足以奴
命封胡走僵養炬矣畢子季瑜攀雲肇夢唾地成文生崇薊
穹窿之門奮銳銀旭歷之學七誘十醉盧牟乎羣言五志四
名曲暢其精旨穿溟泮麗鴻以立幹喻厥淵深融瓶盆釵釧
爲一金方茲辟灌遂乃飛走文翰吐翕芳華伯歌季舞聯藻
盛乎襟裾前于後喁獨秀壓乎花萼推原得力匪祇才雄抑
亦有天相焉蓋其世父弇山尙書以列緯之身作八州之督
鋒車所蒞珊瑚肆張方聞之天士編削之儒梟大師宗高密
之嗇夫絕業闡永元之浚長弦詩者說窮五際呈藝者人集

八能纓綵景從俊傑麻列季瑜屬其際淬厲有加珠林策
而詞颺聿興學刃攢而文鋒益峻往往一篇跳出鴻律賦乎
幄寶九變樂成龍文歎乎家相斯豈後門之寒峻白望之玄
磨所能比跡也況乎輪蹄供其睇眄嶽瀆助其襟靈挹蓮峰
神女之漿汎灑豪素聆緱嶺王喬之奏協應宮商凡鶉首所
以興秦鴻溝於焉啓漢魚羊雲擾之地熊貉兵爭之區莫不
聚山河於掌中發符采於馬上落落清嘯竦韻流蘇門之音
茫茫古懷填胸貯廣武之淚是又非蜷局粉榆嘲弄風月者
可方軌齊驚矣且也陟榮朱紫則綿蕝之功妨勒勲梓孟則
藻詠之道損業不兩進自古爲昭以季瑜台袁右宗藹鬱光
譽使就任子之令繼保釐之規若崇祖之於豫州効度之於
太傅何難蟬蛻滓濁擢景神塗而乃志阻高箱業同白屋囊

素橐筆力倦庚郵之籤折牙摧橦僅射乙科之策未免青霞
鬱抱金錯言愁對明鏡而惜媼娥坐空山而携冰雪煩腸沃
耐則速藻吐其洪輝妙心煉年則刻葩同夫神匠故能妍茂
騫擲騰連飛超辭放瓊琚青玉琢文之字手爲爐鞴吉金冶
定之功以視收偉績於折屐纘宏緒於擁騶嗇彼豐茲成此
英絕尤不可謂非元造已兆蓀閭左寒悴世請求行倣應瑒
之文論惜識於照隅誦張衡之仙詩躍心於觀綺屬當寫定
誣諉弁端雄或軋霄崢麗或洗晴雪劇鉞心腎拔萃襦紬諒
哉餐防風七日之香餘味未歇嗣會昌一品之集別本孤行
悠繆諛詞非敢相溷聊撮指略用代糠粃若謂宙合廓然瓌
材有數雄文非桓譚不知好雌霓非王筠不能讀則是豆盧
序首祇有蘭成臨淄傾心僅推德祖是誠王微所云瓦礫有

資不敢輕厠金銀也

陳藹人詩序

自四聲肇始韻事方滋百緣叢生溺音騰沸要歸於暉麗萬有獨榮心靈停雲繞風不必號鐘濫脇也吹葉嚼蕊無取夔吼鵬爭也韓非云豔采辨說揚子云綠衣三百色如之何知此者可以讀陳子藹人之詩矣藹人少席華胄壯飲香名息土人姣有媯族大擁書靈檀之几角藝長楸之街吐文萬牒莫非夜光淬鋒十年鬱成宵練固已極旭歷銳銀之志將以贊密清舄奕之休而乃牂跛不前魚登屢困飛蓬作鬢青草爲袍言愁則金線年年吐恨則春蠶寸寸不無勾瀆有待經寃況以通倪風裁便嬛逸思爲洞簫作謚取腰鼓纏身鼎社環開甕精鱗萃花飛釧動夢窄春寬得無一聲河滿輒喚奈

何十里前溪偷歌阿子至若文簫靈匹匏爵芳緣善法堂開
楞嚴眷集通絮語於華鬘天上證蘭因於耨達池頭瑤想瓊
思流波不息金迷紙醉綺緒紛來間作廋詞半歸側體逮乎
紡磚別鶴金屏擁愁以玩婦高柔作誄亡孫楚雖復金釵阿
杜難解胸春繡襖舒祺祗增眉繭是又歌離弔夢望窮紂絕
陰宮唾月推煙恨裂坤靈扇牒者矣於是摘風裁興效騷命
篇根情苗言葶甲新意或金相玉式豔溢鎬豪或霜辛露酸
聲逾脆竹此葢都尉鴛鴦之什展商曲清聲而非魏收峽蝶
之儕掉蓮花輕薄也今春予聯蘂金閨出觀瓊什拊髀雀躍
勸付琬鐫藹人方且黎收以辭悞慳而謝謂翡翠蘭苕之製
慮薔薇芍藥之嘲幾將以歌詩高厚自繩引開卷王昌爲戒
則豈不知宓妃娥女誕詞也而三閭以忠稱浩水育魚麗語

也而寧戚以行顯平子樸學數詠美人休奕直臣善言兒女
賦朱幃者泉明乃高士作金樓者蕭繹實眇僧廣平梅花昌
黎銀燭致堯骨鯁寄意香奩和凝俠腸託詞帷薄司馬之鉛
華寶髻大范之濁酒殘鐙忠簡梨渦歐陽江柳歷稽前哲綺
障如斯類皆真宰不存翩其反矣藻詞謫喻又何傷焉彼區
脊溝猶矜激偏解必謂屏間色於紅紫耀正采於朱藍作法
秀之訶爲泥犁之警則是康成所謂曉一孔之人而彥和所
謂東向而望不見西牆也調言未終徊徨已失用排目論付
彼手民馬腹何愁蛇珠在握君如溫尉將金荃命名我愧徐
陵爲玉臺作序

元南林詞序

紗厨夜靜雲間流璧月之輝花徑人來袖底出金荃之集謂

謝傳中年多感祗憑絲竹傳將謂周郎少日知音試盟薔薇
讀去於是闕關送客翦燭開編擷寶薤之千行勝珍珠之百
琲淒切則乳鶯雛鳳華年彈錦瑟之弦豪雄則鐵馬金戈壯
士下銅琶之淚鏤心貯雪嚼齒生風拈豪而海水羣飛擊節
而天葩欲散織綃泉底去塵眼中夫何愧矣慨自讀曲人稀
倚聲道廢情殊杜牧豈解傷春客老何哉誰工作譜遇魏三
於筵上冷落紅牙弔柳七於風前淒涼仙掌豈非其風肆好
何爲響絕人寰得無不平則鳴要在情鍾我輩元君南林以
吐鳳之清才值雕蟲之多暇桃波柳浪春題漢上之襟蠟淚
爐香秋動畫堂之思碧雲日暮未免有情紅豆江南詎能無
贈況復平子工愁馮唐寡遇跳雙丸於天上白髮催愁鬪八
米於風檐青衫帶夢瓊樓玉宇空翻水調之歌斜日西風怕

聽山陽之笛此所以湯休寫怨色雖好而非淫中散揮弦琴
以哀而愈促者也獨是秋雁橫汾李嶠應呼才子春風紅杏
朱祁曾號尙書宮中噪元相之名塞外播稼軒之曲固知搓
酥滴粉合翱翔供奉之班不則縱酒判花亦跌宕笙簧之座
而奈何鶴只語寒蟲惟習苦似近彈碁之局心最難平渾吟
伏櫪之詞壺真欲缺君誠好事恍畱遙響於鈞天僕本恨人
忽觸前塵於昨夢憶賤子垂髫之歲正家君作宰之年焉支
塞上漢月臨關拓跋頭秦雲壓幕時撫懷於秋色亦莫按
夫春情往往墨染弓衣黃衫停舞幾分紈帕紅粉驚迴南山
射虎調拈馬客之題北里停驂句入鯤弦之譜迨乎琴鶴東
還鷓鴣南向吳宮花草不解埋憂山下蘼蕪誰能蠲忿溯醉
紅於綺歲酒冷香銷託望帝於鵲聲弦么柱促撲金釧而無

緒看紅蕖以奚堪今誦新篇恍逢故我相見爭如不見倍添
美人芳草之思言愁我始欲愁能無病鴛傷鴻之感所幸白
社依然黃花無恙偶緣星聚得識眉山須趁月明同酬子野
但風流之足樂卽顧領以何傷檀板節而銀箏調蛾岫聳而
鶯簾卷他日秦青按拍冀裁蜀錦以酬歌此時劉白傳觴且
作漢書之下酒

甯止齋云寶主錯綜無一筆漫下是選體得古體結拈者
故節愈高神愈遠但以壯麗目之猶屬皮相

此乾隆辛亥歲客潁州時作甯徵君止齋極賞之予以音
調入時詞滑而氣薄久屏不存今止齋已歸道山念良友
之云亡感知音之永逝不忍終棄聊復錄之并系止齋原
跋於左以無負故人見推之雅云

自記

徐企范詞序

自端伯編雅詞鮑陽輯復雅倚聲一道率崇標格泥犁冶音
草堂僞體滌瑕蕩垢若振槁焉其弊也稟詬無節皮傅相因
排焦鏤脆旣涸其心波褰芳擷腴徒襲其郭郭盃脫何取栗
陳可嗤間或矯之又流靡宕燕女溺志不登於大晟猛起廣
賁有乖於小雅分流僭馳於道益偕去此兩失方足言詞崑
山徐子企范健庵司寇裔孫也三戟望峻九能學成出其餘
波韻譜比竹漱海雨而入頰料江流以潏腸遏雲雲停鼓宮
宮動感羈孤則潛蜚語砌抒騷屑則寥鴻唳秋年年木瓜之
山酸心自領寂寂然鐙之炷有由難明往往十斛量愁一升
儲淚其或酒香黏袖人嬌當花左徵揚而右宮沈命嚴春而
使叔子看朱成碧狂言展其眉青判白批紅秀語奪乎山綠

亦復箏牀箋落梨頰渦生要皆劇鐫心神疏淪靈府媒不墮
於馬腹雅不類於虎賁鉤弦而爪甲塵清按拍而纖髻影躡
舉秀韜瑕庶幾近道矣君嘗謂予一生趨詣首在玉田子竊
疑焉夫玉田以烏衣貴游摘白雲麗藻屬丁叔未寫厥牢愁
感深者語長弦急者柱促君蟬嫣鼎望遭際昌期會當獻靈
夔歌朱鷺譜箏箏之奏中莖韶之宮豈與夫眇睇山河聊浪
琴酒者同年而議豐确哉嗟乎五百車歡喜之九情緣曷極
廿四官真靈之座慧業誰多所願清角調高紅杏聲貴雲門
舞而箏瑟洗咸池陳而鞞鐸和於以揮綽三雍襄佐七德紹
庠家乘協律太常則是編猶椎輪之始也

雅樂精義後序

嘗讀班志藝文凡樂六家百六十五篇師中趙定紀述其鏗

鏘制氏寶公布陳其爪指樂書之獻頡頏聖經自古籍湮淪
史志襲繆掬箏擘阮之事濫列乎儒家伶工技師之言錯附於
經術識者興嘆於道悖矣逮考鄭子敬氏書目謂儀注不得
附禮編年不得附春秋後之樂書宜各爲類直齋陳氏遂援
斯義凡諸琴說退置雜藝之前以姬孔之雅弄下儷巴渝昧
牙曠之神解概同部伎道藝不分古俗淆亂偏激之論寧復
有當乎我外大父蔡能一先生元漠秉質恬敏宅心辭榮就
枯削迹捐勢橐筆西邸間爲鄒枚之遊繫情北山力謝孝獻
之辟獨以覃思研究琴旨上探空積忽微之數下及摟撚撥
將之法因流泝源斥哇去鄭彙集成說葺爲全編總統古今
辨析同異末附新奏所謂神而明之之事樂出於虛技進乎
道宣揚中聲羽翼經義蓋非墨客之師傳箏人之譜錄所可

齊眊也伯仲兩舅嗣芬早世兆蓀生晚未瞻西州顧於騎竹之年獲聞折蓳之訓矣我母氏慧發髫鬣智周徽章在野之馬窮中之牛離羣之羊登木之雉審其和繆鳴其廉隅得物符手得手符物嵇心羊體獨精其傳春徑晝淑秋堂夜闌風暄拂巾月大當戶茗甲欲坼爐香方酣拄指鉤弦輒作數弄愔愔乎穆穆乎導和宣情悟靈感物信然哉嘗手是書顧而嘻曰此攬醪之津梁雅歌之統會昔濟南弱女能傳父書陳畱才媛克上遺籍予齋斯志欽欽如何兆蓀敬而聽之弗敢忘諗風木銜恤燧穀愴懷悔恨蒙心失肄疇曩屬有女弟恂解轆弦邃旨元文未授十一緬追絲桐養德之義深抱蓼莪罔極之哀遠慙陽元宅相之言近軫廣陵絕弦之感遺佚滋懼爰按錄而傳之補缺訂訛將以竣諸達者登六藝之略卽

無覲於蘭臺調五音之鈞或遠軼乎簫譜爾

送尤祖望學博膺薦入都序

夫繁弱登御而高墉之功顯孤竹在肆而降神之曲成士有懷翰翮備方圓日下粲爛部分如流陵雪褒穎貞柯於焉振芳練素表名油帛因之書績吾友尤子祖望殆其人歟夫其黃中通理潤古雕今肘書一壺吐文萬牒凡夫天口聖譯之製瑰偉連牂之文四聲八病之詩五角六張之賦罔不溺苦於學瓏玲其聲傲試席而孤熊隱叢繪國圖而天馬在手試僕射策杜正統誠好秀才署行義年蒼子禮得冠貢籍遂乃圓橋觀聽觚稜對揚亞賢良科作文學掾非補屨以干將實開瑩以荆玉也獨是文者身之藝藝優則幹局疏筆者情之苗苗繁則智源涸剝心燂掌之士難與識諛諂振翰摘藻之

才不可論鯁摘其有彈豪落紙榮榮鴻章而又當官理人行
衍辦舉自非齒角兼與誰復白黑分明而祖望則大夫九能
君子不械精越暝士迂嗤槩人李普濟程材入麤入細管夷
吾用智一龍一蛇短檄召而青油開長史辟而丹籍判黑頭
謝掾廣宣六條詔書白馬公孫總說數曹吏事花飛牘背風
旋筆端視夫蝴蝶階閒芙蓉官冷此家疏誕不中功曹人世
婆娑祗堪碎職豈非俊雄者熱烈么麼者芻微鳳舉鴻翻青
雲貴自致耳何怪乎三蟬八座虛襟而欵賓王十繫六雄交
牘而推齡石也哉維著雍敦牂之歲祖望登上計之章列焚
香之表擢諸比校舉任典城蓋將以甄賢能勵綱佐也論者
謂抱龍淵椎成之資天流虹電奏苓落朱子之曲子有簫韶
金馬嚴徐待子久矣何必汲汲驅鹿車馳耶不知拒格之松

依乎日月不若取以蔭塗也吉雲之露盛以琉璃不若濡以
被草也彼夫蕭杙作相郁樸登朝轉恐立竿懷慙陸沈自隱
豈若一城如斗史書大大之功五等爲侯手造元元之命鴻
烈之言曰以所修而遊不用之鄉猶樹荷山上而畜火井中
也祖望其知之矣於時素秋屆節天風隕霜爰飭裝衣爰祭
軌道衡流方羊將沂北而上焉雙舄東來人看短簿一時西
笑盡望長安小侯入

覲六駿金版之才

天語臨軒一丈緹油之錫由此拜腴壤綰銅符領第一清助
登三化報二十七最署三十六曹以古況今如竿取影僕也
援孤地絕羽落心傷詩詠墳簾及爾如貫人非桃李豈得無
言所願靜以養和節以行惠撫掩憐牟愛也愛則網疏椎拍

宛轉巖也巖則民劫鈎距不廢而鱖魚莫傷譽妯乃煩而害
馬必息權通介而於道大適合夷惠而與物爲春用晦爲明
鮑永不妨轡緩以文喻治士衡祗患才多縣者弦也昂之而
已嗟乎雲龍投分恐無逐影之期秋雁隨陽尙有呼羣之戀
途遙力弱情滿庭虛去馬歸軒人間天上結飛霞以爲佩遙
聆仙吏聲清望綺雲於層霄莫使故人書斷禱慙張老義附
僕夫聊助清風使無忘諗

張子白進士入都謁選送行詩序

嘉慶己未五月華亭張君子白以綠衣籍久赤牒符來將謁
選人用邀除板弭楫吳下稱妮而前凡在撫塵不遠數郡莫
不鱗集麇至張飲於虎阜山房爲之錄別禮也維時鶴蓋成
陰魚遊認隊麥風吹以衣舉梅雨浥而酒香效團雪散雪之

詞賭大山小山之什驅煙使墨旃檀逐芬流珠吐霞松篁亦
韻文枯樂奏鳥嘯歌來雙了喝蓋眉招柳路之風一笛迴潮
星爛菱塘之火至乃車子維坐寥姐當筵氣暖吹蘭眸清射
戟花邀佛笑詩維仙心樂哉斯遊忘其別矣樂舞旣闌衆詞
迭陳各吐心聲間爲目論約有數端蓋可得而言焉或謂莊
揚墨晏家各殊科廉范嚴徐致難合轍以彼雅文辯慧逸思
雕華不以之簞承明侍溫室潤色鴻業校理秘文而乃促訾
以走風塵陳掾而領赤望能無崑岡玉賤鵲抵生愁枳棘風
多鸞飄起怨也乎且夫錦不爲帟者才之限戈不眷黍者器
之殊今之令長古異清流上仰宣明之面則腰笏趨之下迎
陽橋之魚則扱綸吸之山民樸而市民玩絲慮其焚一清望
而二清才射懸其鵠君以風逸煙高之致讀司空城旦之書

未免埃壒嫌煩神鋒慮峻蕭育是杜陵男子何肯詣曹裴秀
實儒林丈人不習爲吏但使哦松署牘挂笏看山庭延風月
政倦戴星詞吐虹霓訟難掃電此則弦歌雖奏轉來謠詠之
聲桁楊不施無當亭疑之法是又官方所排迕而執友所憚
餘也凡此躔言要皆調語侔色揣稱蒙竊惑之夫目上耳下
哲士之鑒澄轂圓軫方通人之用大子白元慮速捷中轍外
明古懷抗雲書眼若月無三豐五交之失有博分致衆之心
不鞠錄以檢身竊比和者好粉偶跡弛以諧世非同怠政曰
穰今者低頭入中依方銓引試當官官辦作夏雨雨人何美
乎清華何嫌乎凡悴是故於其測交也信其獲上於其鑒古
也信其燭機於其壺士也信其活人於其悅情也信其和庶
天殛能解必不閃掄以苟全金心在中必不愉縊以尸職佳

乎吏也侯其禕而蒙則更有進焉者非於策名之日先爲招
隱之詞實以投分之深常有停雲之戀苟當徵明未耗譽業
方籍最報吳公祠畱石相遂迺絳霄在望黃鵠高飛理東山
之舊懷踵南瀕之逸志一行鷗侶寤後之往夢重尋七里鶯
花春餘之墜歡再拾豈非落落焉其有風颺者哉我之懷矣
異乎人斯借曰贈言如是而已若夫璫慧者圖其淺利蠶
者貌爲篤誠計階級之崇庠量壤土之肥瘠謁府則頭搶據
案則心盲禕蝨自跳網蛛坐結必沾沾焉反以杜畿爲疏誕
斥王衍爲清談是自處於桎梏疏屬而笑夫帝之懸解也衆
客聞之盱衡而笑三爵旣盡四聲遂歌卽用荒言以爲前馬
計送行詩若干首詮次於左

錢可廬徵君六十壽序

緬惟泰上成鳩之族。紉道以修齡。殷家斟雉之賢。研典以度紀。其時賔蹟職樞。淳固龐鴻。無康爵以祝。曼延嘉頌以光。魁碩泊幽雅歌夫。稱兕遷書紀其帑。韞義取媚茲事。殊覽揆歲。歷綿屢俗。尙伊優乃有盍介。俱以騰觚。繡盤悅而致語。霜豪頽滿。卽曰綺季之儒。霞漿手斟。動侈祈淪之齒。是爲蔓辭修禠。飾走肉以佺喬。華說煇爛。謬靈光於草木。卽或位躋夔禹。齒過商蒼。引田相以小車。築羅城於大甯。餐物十七。踈馬宣綸。寶從三千。珥貂獻竿。斯誠極國者之光榮。仰宗模之照難矣。然而地靈無對。天爵不存。予金張以鶴算。何當鴻儀加梁寶。以鵠年終同。蟠晷古有不鐘鼎而名。似泐琅書。未旄期而齒可齊。貞石紹金鏡珠囊之業。則爰皦契其精神。永丹文綠牒之傳。則彭聃遜其綿亘。是非經神學海。貫串九流。義府儒宗。

皋牢百氏其何以副禮文於高密道彰德事之更協中論於
偉長美著聲聞之壽若今可廬錢先生者乃真可跨蹠眉梁
拔張艾耄者矣仰惟先生上德若谷大方無隅管子五官之
技翦角而卽通軒轅九行之臣禔躬而咸備滂仁擴義八疵
不嬰鑽堅研微六府如燭凡君魚失傳之經臣瓚未析之史
館陶永嘉之本魏郡安釐之簡以逮春卿綈裘武安槃盂三
摹九据之瑰奇六甲五方之細瑣固不徧探坎井洞啓鈴鍵
寸策釋旨無八十宗之訛稽古詮辭逾三萬言之富鄭君作
答義據通深獻王航書實事求是凡諸箸饌略可臚陳蓋自
牟貫傳詩三家浸佚賈崔集異二籍無徵卽浚儀博攷墜文
鄱陽問明古義科木啜鄧之字關雎離黍之詮亦韓說稍繁
而魯齊多略先生蒐百代之遺說掇兩京之緒言匪直采鴈

鳩於苟卿証碩鼠於寧戚。劉彼陋宏農之注。尋今引轡令之
篇。要使微學匡扶。佐義荃於劉氏。異聞羅絡。補詩故於廣川。
爲詩古訓十二卷。又以學覽潭奧。孔徒纂其源。爰歷叢殘。清
河撫其緒。而犍爲文學名在。而籍淪江都。秘書音存。而注軼
乃蒼稗墳典。鉤稽縉繩。擴景純之拘識。嗤昧菽枲。愷之疏作
稚讓之功臣。絕柳卯桃萊之外。爲爾雅釋文補三卷。廣雅疏
義二十卷。唐釋元應有云。說文在漢字止九千六文。挺生代
加繁廡。是以江式論書之表。致辨於魏蠡謙中。銘墓之碑。力
爭夫巍巍抗心。睎古必宗。汝南尙已。然法求尉律。僅舉方隅。
學紹永元。未稱統括。先生究八體之宣奧。積二紀之勤劬。滙
往牒而証義。奚止持弓春藁之文。本古讀以審音。并糾神石
羽鹽之失。驗唐初之善本。越好同聲。訂宋代之新增。緘纔別

體類斯旨要十例攸分。集文字之鴻圖。表言音之藻鏡。稚川
仙令。無此淹通。廣陵哲昆。謝其洽孰。爲說文統釋六十卷。庚
言未已。乙部尤精。謂班范記繁。摩研靡罄。劉吳刊誤。漏略滋
多。於是博綜縹囊。兼參石墨。闡幽抉滯。上裨乎應服。如蘇補
闕。按訛旁徵。乎華袁謝。薛蓋長安。洛下之古語。悉本周秦。顏
監章懷所未詳。尙存金石。惟能殫功於蒼雅。探秘於翠珉。故
得別篇跳出。富倍敝歿。巨秩結成功逾。靖似爲兩漢書辨疑
四十四卷。昔蔚宗之作史也。蠟車遭棄。志表無聞。司馬續書
藝文。獨闕。迨迪功十表之補。條例嫌其濶疏。平原八志之注
冊典。忘其甄錄。因復磨丹。握槩覆簣。成山斜上。旁行直踵。邊
延之墜緒。條篇撮旨。略依歆向之前規。爲後漢書補表八卷。
補續漢書藝文志二卷。他若白水真人。拓跡開統。墨綬長相。

下體臨民。三邊戶狹而置令。南陽人稠而設長。或以湯沐改號。或以水土區分。艷次糾紛。釁規匪易。官儀不爽。體原於應。劭衛宏碑。拓堪憑證。及乎蕩陰酸棗。爲後漢郡國令長攷一卷。至於巴西載筆。裁斷略擅三長。河東引書。遮羅殆逾百種。而蕞殘玉屑。亦待補苴。巖抵隙乘。不無棄校。爲三國志辨疑三卷。下至鱗匡鄙諺。狸首哇詞。标畔大隱之諧。落索阿姑之訴。悉爲推求雅故。剔荆淵源。間介婁羅。入深寧之掌錄。笑樂鮑潛助景文之筆談。爲通言二卷。猗歎盛哉。是皆探纂前聞。汰汰後惑。禮堂寫定之本。萬流仰爲山淵。元亭解剝之編。六際歸其纓橐。浮滄升嶽。方魁士而無慙。書肆說鈴。見大師而坐廢。此雖鳳輝隱曜。麟德寡諧。發策決科。兗數奇於秋賦。併名比牒。僅一應乎徵書。而董綬儒臬。劉臻漢聖。學林捧手。寰

海承風傳五經六緯於緇壇名高汗竹萃三才九疇於逢掖
貴歷台槐漆園所云博大真人仲任所云鴻儒金玉先生之
謂已且夫述學者以門業爲歸衡福者以倫常爲大兄儒弟
墨或緩翟之交訂武達文通究壘篋之未協雙丁兩到競爽
斯難而先生之於伯兄竹汀詹事公也職進齊聲恭丕並著
景通之授班史偕仲氏爲宗師宏正之發易題引四公而申
助劉孝儀黃經相勵徐伯珍白首同歡何家大小之山瞻如
喬嶽陸氏東西之屋迴若神霄此其難及者一也古者霸陵
峻節賃廡揚芬司隸清風挽車修義曩賢相室尤重女君倘
使賦撲棗於王陽訴腐腸於馮衍則高明莫遺少文無協趣
之期淵蠹將深孝標有軾軻之戚而先生德配周安人端操
有蹤善心曰竊庀業寢門之內課功臧獲之班紅燭持籌雁

稅魚租之無乏。青裙押俚。瓜區薑稜之咸供。先生乃克壹志。朱黃專精典素。答樊英之拜。氣總祥和。筮焦贛之爻。占符宜吉。此其難及者二也。況乎鄧侯諸子。六藝分通。戴碩三兒。萬錢足敵。桓君章句。仲恩將繼於太常。騶氏春秋。中尉定傳於京兆。以視南郡長郎。僅摘華於魯殿。崇賢館士。止續學於選樓。不又河漢之於涇渭乎。此其難及者三也。福兼百順之名。椿陰正茂。譽有億齡之播。葉語難休。無論郡下封輶。殿頒綈。凡細陽太尉將誨藝於元和。重席侍中會論經於正日。盈庭薦牘。臧綰稱師。異日舒翹。韋匡繼跡。例茲榮遇。三壽可卜。於作朋。卽論光名。五福已徵。其戩穀今者。躍躔析木。候啓元英。歲符甲子之周。辰值庚寅之降。高陽里彥。攢弁如星。通德門徒。聯裾成幄。均將駐義轡。肆賓筵。醕園公之樽。納伏生之履。

下徵幃語用侑觴行兆蓀皮傳心懽膚受學陋效讀書於白
季尺間終虛修雅拜於龐公杖函初撰欲使濡豪繪日撮壤
崇山政恐賦成六合適彰劉子之愚頌到九如祇等越巫之
祝是用力破崖岍盡斥游談舍雲屏天保之浮夸轉虛牟乎
述謬竊蘭臺儒林之旨意兼紀叙其家傳以爲傾汲郡孔堂
之瀝液則酈泉菊水不足當也希賢關聖域於門庭則福衢
壽車莫能媲也然則鋪陳鈿軸卽鴻朗之千函斟酌謨觴抵
鶴尊之百醕山澤挺芝英之兆定先衆瑞而華敷鼎彝斬綰
綽之銘敢首諸賢而隍引

江寧金石志序

代

古者銘勒金石質之乾坤不刊之典鐫刻是賴而山谷遷貿
剝蝕無時於是振奇饗古之士網羅散佚紀載興焉子尾犧

尊甄邯威斗敦鬲之細寶均璆琳豈況垠塹所泐義倣槐眉
宮剝所遺文碑竹素千劫炳然耿光丕顯者乎原甫永叔明
誠伯思凡諸纂集完秩具存至若紀方隅儲掌故地專乎一
郡跡羅乎千禩著於目者自宋北平田概京兆一錄而外作
者用希陳睟吳中新編祇載有明無當稽古近惟葉封嵩陽
集記盧牟該博爲世所稱金陵帝王故宅貞珉翠墨應倍他
州鍛收礪牛存者什一某君抱彥遠之閑覽居建康之右壤
剔隱搜遐排崑磨蘇舉夫窺軻樂石挈萃異文小不遺瓦磚
瑣不遺韻語上遡嬴漢下泉宋元椎拓所及悉歸掌錄具登
文字例沿乎鄱陽間附參稽核逾乎夾漈物質有時而盡斯
卷歷久不渝其視郭髯趙岫之史籍隸西秦地多古刻難易
不侔用心蓋彌粹矣猗昔鄴中宮觀洛陽伽藍東京夢華桂

林風土雖有輔於翰藻或無涉於學林方聞之儒寧舍彼取此抑又聞之元代徐碩撰志嘉禾碑碣一門卷至十一摠幽抉粹識者遽焉世不乏陳思王象之其人者例斯譔述引而伸之廣徵勝流各事刪緝山巖屋壁所秘必有盡發其藏者於以証延閣之墜簡裨內史之方書是編非層冰之積水歟

贈汪孟慈序

冬官之工三十築冶鳧桌段桃韋裘鐘幌十者獨以氏稱鄭君謂人以事名氏舉世業雖在曲藝緒必有承語其煒赫則伏理之於湛曹充之於褒王吉之於駿桓榮之於郁此析經之重光也談之啓遷彪之啓固察之啓思廉德林之啓百藥此研史之累徽也乘臬投辭羣紀敦行莊拙標華善邑稽古此又文苑之門基學林之弓冶也終文之綸漆園所美視土

事火廣川所稱父者矩子者率奉承續行因而非創蓋於道也易於理也恒焉廣陵汪先生容甫以沈博閱覽陵轢當世游百氏而窮訓囊九流而暢旨以蒙來叩煥若星辰以疑相質洞若著莢所著述學若干篇薄海希風萬流仰鏡中壽恒化楹書哀然哲嗣孟慈終賈綺年沐浴庭誥辨藉稻賦靈光聚爲玉海擲爲金聲日開月益嚮伏儕偶缺而不已爲文宗爲儒師曩所謂重光累徽門基弓冶蓋於是乎在歲惟闕逢辰次龍旂墨車在門儻籛於豆孟慈當大昏之期同人爲沓酌之侑啐醴建柶無取繁辭爰述門業載陳穀貽顯顯宗子克懋先基爲鄭益恩禮堂紹芬若周奉叔縈攪萬人庶恢世業用啓後昆至於渾戎峻閭瓊頌舊勳橋梓軒輶堂構輪囷此世俗之所榮非所語於斯文也

周易疏義序

易自鄭宗費學析傳附經魏王晉韓重復釐定分篇舊牒體貌遂更宋董楷既截朱以合程明胡廣爰踵訛而并帙荏苒百禩循誦習傳甚至試官發策題聯爰象塾師釋訓義羣姬孔不知三聖淵奧遞加引伸十翼發揮漸臻彰顯畛判軌別絕弗容淆我

聖祖仁皇帝御纂周易折中衡鑒卓越悉遵古第至於課士仍襲正義用便學林佔畢生徒人有疏解陳因坊刻多於泥沙要宜如紫陽所云卦辭略舉大綱彖傳乃宣疑滯俗說凌亂複衍繁蕪駢拇枝指識者爲病嘉定陳君宏猷高恪寡素殫心道真嘗輯疏義一書抑黜蔓言演暢微旨健順明詁不侵乾坤之繫辭通固詳詮不潤亨貞之占義於經傳之界如

汜畫塗如錐印泥章句沿今申析契古允俾區霽小儒闇然而服已念夫鼎祚集解派列卅五審權義海說綜百家漢唐遺文千載未墜眇茲講說誠難上方顧近儒攻經類崇漢學閩洛名理轉眇窺研斯編雖微要亦本義別子也陳君尙有四書就正錄及析疑二書其弟子王定山將彙刊問世屬予弁端或冀里鄧黃小由此以上等祖本不狃俗傳撮襲崇山涓流益海是豈宜以簡略廢乎

淮海神弦曲序

淮海神弦曲者題襟先生臬同人消寒分課詩也時維元英急景濛汜匿華稜生霜威凌蹙沼鏡荃情馨逸撫凋年而失愉詞條繁廡對羸林而亦悴冥想間作靈談是資茲邦裡秩所存昌丰所矚祀不分陰陽典不區正誕遜作神樂以代禩

縣蕪繚芷緝荔丹蕉黃先生旣敷衽以瞰羣客亦傳芭而舞
九旻馳爽八方蜚精華鐙曖慢靈風弼而欲開清商汎堂飄
雨颯以成夢明明如月山阿有人霏霏似煙景采若質文翰
之事有呼嘯之偉焉煙墨所驅有矜隱之感焉間攷蕙殺陳
醕肇始荆巫竹枝獐詞浴波巴熨淮海於周季亦楚分也揚
枹之歌呵壁之問恤乎湫乎信騷人之別子矣昔巫咸降夕
懷申椒而相要舒姑流泉聞絲竹而自涌感召之理通乎幽
遐屬者罄集駢闐籥鳴芽蘗或此筌札達諸精祇則若瑤姬
搖佩煙鬟下巡羅喉燁威弓刀自動澹菑鴻祐斯非六祝之
遺乎

送樂元淑歸臨川序

梅熟蒸夏絲橫網天羈侶孤於餘花客愁然於朱火樂子元

淑有噬指之行璫札之寄總轡首路將歸臨川夫孫竹筩管
空桑琴瑟繁指競響同聲合宣當其鏗鏘自忘和會及夫一
器離則樂節詘一音睽則羣奏乖況乎形影駢服肝膽蛩駘
而東羽西翼單情不雙六旦五晨獨弦無儷契濶之戚尤倍
苔岑宜矣雖然河梁之義以較陟屺則輕鳬雁之情以方伐
木則切樂子楮蠡懷訓於堂北熨體軫念於中閨負米道遠
而咳蘭損歡上計期遙而簣翽失樂縱復握抱荆璧孕含隋
珠扇覆江湖之上振聲宙合之際返之淵衷益慊慊焉及茲
良日拊衿倚檣雲扶風承邁返衡華投懷笑粲宛然嫕嫕披
幃欵存什百宴爾婉婉植熟進子舍之匱漿填窳伯仲話已
日之陳事青山几前流水屋下鄰人牆頭夜闌而相要田父
酒間月出而未去斯垓壤之至快恬聚之極致視夫依傍韜

沂波蕩綺座聞河滿而淚溢承睫眴雲停而歎息彌襟悲愉
之懷相去億萬吾黨又何戚焉且夫無恒者綦跡遠遊者騷
人使樂子田有負郭材同社樗遺金門之步蹈霸陵之軌遂
得翦茨守畦飲谷蕤照偶影麋鹿長謝舵轅則此分張便成
永阻而樂子有必不能者槐燧易換蓬心終飛慎護波濤珍
愛金玉盟以息壤拾此墜歡是固樂子所綦歎而又吾黨所
竊幸也